

**U**S**M**UNIVERSITI
SAINS
MALAYSIA**APEX**™Jabatan Bendahari
Bursary

Rujukan : USM.JB.HB.G.4/2020

Tarikh : 17 November 2020

Universiti Sains Malaysia
11800 USM Pulau Pinang
T : 04-653 3131 / 04-653 4288
F : 04-658 8205
E : bursar@usm.my
L : bursary.usm.my / www.usm.my

Dekan/Pengarah/Penyelaras/Ketua Jabatan
Pusat Pengajian/Pusat Kecemerlangan/
Pusat Perkhidmatan/Jabatan

Kampus Pulau Pinang
Kampus Kejuruteraan
Kampus Kesihatan

YBhg. Dato'/Prof/Dr/Tuan/Puan,

HEBAHAN BENDAHARI BIL. 4 TAHUN 2020**- ETIKA MENJALANKAN PERNIAGAAN DENGAN UNIVERSITI SAINS MALAYSIA**

Dengan hormatnya perkara di atas dirujuk.

2. Dimaklumkan penglibatan Universiti Sains Malaysia (USM) dalam *Times Higher Education – Global Impact Ranking* (THE-GIR) telah memberi peluang kepada USM untuk menonjolkan usaha yang telah dilakukan serta memberi impak terhadap komuniti dan kelestarian selari dengan objektif *Sustainable Development Goals* (SDG).
3. Sehubungan itu, Jabatan Bendahari telah menyediakan Etika Menjalankan Perniagaan Dengan Universiti Sains Malaysia yang turut memenuhi keperluan dalam THE-GIR. Etika ini perlu dipatuhi oleh semua pembekal yang berdaftar dan berurusan dengan USM. Pematuhan etika ini penting bagi mewujudkan standard amalan perniagaan yang baik di samping memenuhi tanggungjawab sosial dan alam sekitar
4. Justeru, kerjasama Ketua Pusat Tanggungjawab (PTJ) diminta untuk menghebahkan kepada semua staf dan juga pembekal berkaitan Etika Menjalankan Perniagaan Dengan Universiti Sains Malaysia dalam memastikan objektif USM dan SDG dicapai. Etika ini boleh diakses melalui laman sesawang Jabatan Bendahari di www.bursary.usm.my.
5. Kerjasama dan perhatian YBhg. Dato'/Prof/Dr/Tuan/Puan untuk memanjangkan hebahan ini kepada semua yang berkenaan amatlah dihargai dan didahului dengan ucapan terima kasih.

Sekian, terima kasih.

“BERKHIDMAT UNTUK NEGARA”

Saya yang menjalankan amanah,

(KAMARUL ARIFFIN NGAH)
Bendahari

s.k. Naib Canselor

HEBAHAN BENDAHARI BIL. 4/2020
ETIKA MENJALANKAN PERNIAGAAN DENGAN
UNIVERSITI SAINS MALAYSIA

Etika Menjalankan Perniagaan Dengan Universiti Sains Malaysia menggariskan peraturan dan perkara-perkara yang perlu dipatuhi pembekal apabila berurusan dengan Universiti Sains Malaysia. Pematuhan peraturan yang terkandung bertujuan melahirkan pembekal yang beretika serta bertanggungjawab terhadap sosial dan alam sekitar disamping menghalang berlakunya sesuatu salah laku.

Ini selaras dengan usaha Universiti Sains Malaysia yang sentiasa memastikan perolehan bekalan/perkhidmatan/kerja memberi nilai faedah terbaik di samping menyokong visi dan misi Universiti ke arah kelestarian hari esok.

Berikut merupakan etika yang perlu dipatuhi oleh kesemua pembekal yang berurusan dengan Universiti Sains Malaysia.

1. Larangan pelakuan rasuah dan salahlaku

Setiap pembida dan pembekal hendaklah memastikan tidak terlibat dengan perbuatan rasuah serta pemalsuan dokumen atau rekod.

2. Penjagaan Alam Sekitar

Pembekal hendaklah memastikan fasiliti dan aktiviti yang dikendalikan mematuhi undang-undang serta peraturan berkaitan alam sekitar yang terpakai di peringkat negeri dan kebangsaan. Pembekal juga hendaklah mengenalpasti dan merekodkan kawalan operasi yang memberi impak kepada alam sekitar seperti pengurusan sisa pepejal atau pengurusan bahan kimia berbahaya.

3. Larangan Buruh Paksa

Pembekal dilarang menggunakan buruh paksa atau memaksa seseorang melakukan kerja yang bertentangan dengan kerelaannya.

4. Larangan Menggaji Kanak-Kanak

Pembekal hendaklah mematuhi Akta Kanak-kanak dan Orang Muda (Pekerjaan) 1966 dan lain-lain peraturan atau undang-undang berkaitan dalam penggajian pekerja.

5. Gaji Minima

Pembekal hendaklah mematuhi perintah gaji minimum sepetimana yang telah diperuntukkan dalam undang-undang.

6. Larangan Keadaan Kerja Yang Tidak Berperikemanusiaan

Pembekal hendaklah memastikan tempoh berkerja dalam sehari dan bilangan hari berkerja dalam seminggu adalah mematuhi Akta Kerja 1965 dan lain-lain peraturan atau undang-undang berkaitan. Sebarang kerja lebih masa hendaklah dibuat tanpa paksaan.

7. Memastikan Persekitaran Kerja Yang Selamat

Pembekal hendaklah menyediakan persekitaran kerja yang selamat dan bersih sepetimana yang diperuntukkan dalam Akta Keselamatan dan Kesihatan Pekerjaan 1994. Bagi persekitaran kerja yang berbahaya atau melibatkan penggunaan bahan berbahaya, langkah-langkah keselamatan sewajarnya perlu disediakan bagi mencegah daripada berlakunya kemalangan dan kecederaan.

8. Larangan Diskriminasi, Penderaan dan Gangguan Seksual

Pembekal perlu menyediakan persekitaran kerja yang bebas gangguan seksual serta penderaan termasuk secara fizikal atau lisan. Pembekal adalah dilarang daripada melakukan sebarang bentuk diskriminasi dalam pekerjaan termasuk dari aspek pemilihan pekerja, penggajian, kenaikan pangkat, dan latihan atas dasar agama, bangsa, keturunan, tempat lahir, umur, penglibatan dalam persatuan pekerja atau jantina.



9. Kebebasan Untuk Membentuk dan Menyertai Kesatuan Sekerja

Pembekal perlu memberi kebebasan kepada pekerja untuk membentuk dan menyertai kesatuan sekerja seperti mana yang termaktub dalam undang-undang.

10. Pematuhan Undang-Undang

Pembekal hendaklah mematuhi semua terma-terma dan syarat-syarat kontrak dengan Universiti Sains Malaysia serta undang-undang/peraturan/polisi yang terpakai dalam negeri dan negara.

Pematuhan Terhadap Etika

Pembekal perlu mendaftarkan/mengemaskini senarai alamat perniagaan/operasi serta membenarkan wakil Universiti Sains Malaysia melakukan pemeriksaan audit. Pembekal akan dimaklumkan secara rasmi bagi lawatan audit.

Pembekal yang didapati melanggar etika menjalankan perniagaan dengan Universiti Sains Malaysia akan diberikan tempoh munasabah untuk membuat pembetulan. Sekiranya pembekal masih gagal mematuhi etika menjalankan perniagaan dengan Universiti Sains Malaysia dalam tempoh yang diberikan, pembekal boleh disenarai hitam oleh Universiti Sains Malaysia untuk tempoh yang ditetapkan oleh Universiti Sains Malaysia.

Terima kasih.

**Bendahari
Universiti Sains Malaysia**

17 November 2020